

Ambo Sooloh banyak tabur bakti utk bangsa, negara

HAJI Ambo Sooloh adalah hartawan Melayu yang paling terkenal berbanding dengan hartawan lain dalam zamannya.

Namanya tercatat dalam buku sejarah dan diabadikan pada sebatang jalan di Kampong Melayu.

Beliau terkenal bukan hanya kerana beliau seorang hartawan, malah seorang tokoh masyarakat yang banyak menabur bakti dan kebajikan untuk kebaikan bangsa dan negara.

Dilahirkan dalam keluarga yang kaya-raya, beliau mewarisi kekayaan orang tuanya, Haji Omar Ali seorang Bugis dari Pontianak yang datang ke Singapura pada lewat tahun 1800-an.

Kekayaan yang diperolehi dari perdagangan antara Singapura dengan Indonesia, telah disalurkan pada membeli rumah dan tanah. Kebanyakan rumahnya yang disewakan terletak di daerah North Bridge Road, Sago Lane, Queen Street, Jalan Besar, Java Road dan Tan Quee Lan Street.

Haji Omar mendirikan sebuah rumah dua tingkat

di simpang Java Road dan Sumbawa Road, tidak jauh dari Masjid Hajah Fatimah sekarang, untuk menempatkan keluarga dan anak buahnya yang datang dari Bugis.

Bila orang kaya Bugis itu meninggal dunia pada 1921, segala urusan perdagangan dan harta tanah terjatuh ke tangan Ambo Sooloh.

Bergiat

Beliau giat dalam berbagai kelab dan persatuan baik bercorak sosial, agama, khairat maupun sukan.

Beliau menjadi nazir Masjid Sultan, penaung Persatuan Bolasepak Melayu dan pasukan bolasepak Darul Taklam, tetapi pelibatan beliau dalam Kesatuan Melayu Singapur adalah yang telah meninggalkan kesan yang mendalam.

Haji Ambo Sooloh turut membantu pemimpin kesatuan itu, Haji Eunus Abdullah sehingga berjaya mendapatkan penempatan orang Melayu Kallang di Kampong Melayu Jalan Eunus.

Dianugerahkan Jaksa Pendamai (JP) pada 1927,



• **HAJI AMBO**
*Bergiat dalam kelab
dan persatuan*

beliau pernah menduduki Majlis Perundangan dan menjadi presiden kesatuan, menggantikan Encik Eunus yang meninggal dunia pada 1934.

Beliau juga menjadi tulang belakang kepada penubuhan akhbar Utusan Melayu.

Haji Ambo Sooloh mempunyai sepuluh orang anak — empat daripada mereka lelaki — dari dua orang isteri. Sebahagian besar hidupnya adalah daripada hasil sewa rumah-rumahnya.

Orang kaya itu meninggal dunia di rumahnya pada 1963 ketika berusia 72 tahun, akibat sakit tua dan dikebumikan di Kubur Raja, dekat Victoria Street, tidak jauh dari kubur ayahnya.